



Rapport annual 2022

Società

Il nomer da commembers da l'ACEB s'amunta per la fin dal 2022 a 151 (109 persunas singulas, 37 famiglias/conjugals, 5 persunas giuridicas).

Suprastanza

La suprastanza ha salvà dal 2022 duos sezzüdas, e quai in avrigl ed in settember. In avrigl sun gnüts fat bun a man da la radunanza generala il quint annual 2021 ed il büdschë pel 2022. Illa seguonda sezzüda da l'on passà es in prüma lingia gnüda discutada la situaziun actuala quai chi reguarda la cumprita e la sanaziun da la chasa a S-chadatsch tras la Fundaziun ACEB. Implü ha la suprastanza fat bun la cunvegna da prestaziun cul departamaint d'educaziun, cultura e protecziun da l'ambiaint dal Chantun Grischun chi garantischa ün sustegn annual da maximal fr. 10'000.-. La cunvegna vaglia pels ons 2022-2025.

Radunanza generala

Davo duos ons d'interrupziun ha la radunanza generala darcheu gnü lö sco üsità i'l archiv a S-chadatsch. Davo las tractandas statutarias ha Chasper Pult referi sur da «Duri Chiampell e sia descripziun topografica da las trais Lias». Quai in occasiun da la publicaziun cumpletta da quist'ouvra chi'd es gnüda realisada d'incoort da „L'Institut per la perscrutaziun da la cultura grischuna“ a man dal text original latin.

Fundaziun Archiv cultural Engiadina Bassa (F-ACEB).

Acquist dal stabilimaint a S-chadatsch

La Fundaziun Archiv cultural Engiadina Bassa (F-ACEB) es gnüda fundada in lügl dal 2019 cul böt da comprar l'antieriura chasa da scoula a S-chadatsch dal cumün da Valsot, da tilla mantegner e da tilla metter a disposizion sco allogi permanent per l'Archiv cultural Engiadina Bassa. Sco relatà i'l rapport annual 2021 esa reuschi dad acquirir ils mezs finanzials per realisar quist proget. Il contrat da cumprita cul cumün da Valsot es gnü suottascrit als 11 mai 2022 a Ramosch. In seguit sun gnüdas scrittas oura las lavurs pel rimplazzamaint dal s-chodamaint dad öli tras ün s-chodamaint a basa da sondas da chalur e per plüssas otras lavurs da sanitari, dad electriker e da falegnam. Il böt es stat dad installar il s-chodamaint nouv uschè svelt sco pussibel our da motivs ecologics e per nun esser plü dependent dad öli da s-chodar chi d'eira intant dvantà fich char. Cun tuot cha la mansteranza d'eira fermamaing occupada cun simlas lavurs esa reuschi, eir grazcha a las relaziuns climaticas, da far las fouradas per

las sondas da chalur amo avant Nadal uschè cha'l s-chodamaint nouv ha pudü ir in funcziun amo dûrant l'inviern 2022/23. Las ulteriuras lavurs sun previsas da gnirattas subit davo cha'l s-chodamaint es installà. Quai sun in prüma lingia la sanaziun da las tualettas e l'isolazion dal palantschin. A lunga vista ha la fundaziun l'intenziun d'isolar eir las fatschadas dal stabilimaint e da rimplazzar tuot las fanestras. Per far quistas investi-ziuns mancan però intant ils mezs finanzials.

Occurrenzas e lavur publica

Sco manzunà ha Chasper Pult referi in occasiun da la radunanza generala sur da la nouva ediziun da l'ouvra da Duri Chiampell chi ha descrit a seis temp la topografia da la Rezia Alpina.

Ün referat public vaina organisà als 13 october illa sala polivalenta da la chasa da scoula a Ramosch. L'istoriker dr. Jon Mathieu ha preschantà in seis referat, „Il chastè crouda! - 400 ons d'istorgia ramoschana!“, l'istorgia dal chastè da Tschanüff dal temp dals chastlans fin al di d'hoz.

A la „Festa sül Stradun“ a Scuol als 23 lügl han il archivars preschantà ün stand ingio cha la populaziun ha pudü s'infuormar davart la lavur da l'ACEB. Pro quista occasiun sun eir gnüts vendüts cudeschs e periodics dals quals l'archiv posseda plüs exemplars.

Lavur da l'archiv

Ils archivars Beat Hofmann, Armon Parolini, Cla Rauch, Peder Rauch e Jon Duri Tratschin han prestà dal 2022 in tuot 1151 uras da lavur.

Documainta es gnüda missa a disposiziun a nos archiv impustüt da persunas privatas. La glista detagliada da las entradas as chatta sulla pagina d'internet da l'ACEB suot “Documainta/Entradas da documaints 2022”.

L'archiv es gnü visità da persunas cun interess privats sco eir da persunas chi fan lavurs in connex cun lur scolaziun, chi han l'intenziun da realisar publicaziuns o exposiziuns davart temas istorics chi pertoccan nossa regiun.

Per l'exposiziun „Musica d'otezza – Orchesters dals hotels e da las societeds da cura in Engiadina“ i'l Museum Alpin a Puntraschigna ha l'ACEB miss a disposiziun plüs documaints.

Per ün film documentar davart l'hotelleria da bogns in Grischun chi'd es gnü muossà in favrer 2023 ill'emischun „Cuntrasts“ da l'RTR e chi's chatta eir pro Play RTR sun gnüdas fattas registraziuns in nos archiv. Üna versiun plü lunga da quist film gnarà muossada plü tard quist on dal emettur 3SAT.

Tschlin, avrigl 2023

Jon Duri Tratschin, president ACEB